

常郡八邑艺文志

常郡八邑藝文志目錄

東里盧文弢纂定

武進莊翊昆新

陽湖莊毓鉉俊

卷十 七言古詩

還山吟送沈四山人

唐高適

春申君祠

張繼

雜言無錫惠山寺流泉歌

皇甫冉

觀放魚歌

盧仝

走筆謝孟諫議寄新茶

盧仝

聞里謠效古歌

李紳

憶西湖雙鷓鴣

李紳

早梅橋

李紳

翡翠塢

李紳

茶山貢焙歌

李郢

知軍學士文丈新理惠泉

宋歐陽修

送沈景休知常州

沈遵

題慧山泉

李邦直

得王介甫常州書

梅堯臣

冬日送昆陵遲上人

梅堯臣

至秀州贈錢端公安道并寄其弟惠山老

蘇軾

無錫道中賦水車

蘇軾

送施厯城辯歸常州

蘇轍

題惠山寺

焦千之

君山詩

袁然

秦望山

袁然

陽羨浮翠亭

沈遼

留題惠山寺

張商英

感歎

鄒浩

題慧山泉

黃庭堅

陽羨葛亞卿爲海陵尉作葺春軒余爲賦之

韓駒

送毘陵太守劉君受代東歸

汪藻

次韻過顧子美話舊因遊惠山

汪藻

卷畫溪行四首

孫覲

陽羨春歌

陳克

雪夜尋梅

楊萬里

謝九延之提舉郎中自山間惠訪長句

楊萬里

毘陵郡齋追憶鄉味

楊萬里

太平水寺

楊萬里

歲之二日欲遊翟園因寒風而止

楊萬里

燕堂秀才著大經解以長句書其後

楊萬里

曉經潘葑

楊萬里

惠山雲開復合

楊萬里

題陸子泉上祠堂

楊萬里

送袁和叔尉江陰

樓鑰

尤延之侍郎求作遂初堂詩未成延之去國因以奉送

陸游

和孫元可賦張公石室詩

薛季宣

殺虎行謝宜興趙大夫惠虎皮虎腊虎睛

劉宰

喜晴呈葉常州

張安國

謝毘陵使君惠畫

袁燮

題慧山師竹軒

袁植

題惠山

蔣重珍

毘陵太平寺畫水呈王使君保

戴復古

毘陵天慶觀畫龍自題姑蘇羽士李懷仁醉筆詩呈王使君

保

戴復古

題玄妙觀主程南溟所藏馮太守蓮花圖

張以甯

劉常州宅對菊醉歌

元柳貫

寄題惠山華氏溪山勝概圖

柳貫

夜宿太湖岸

曹伯啟

題江陰邱文忠山水圖

貢師泰

題毘陵承氏家藏古錢

吳來

惠山寺九龍峰下酌泉

周權

荆溪橋

仇遠

餞謝子蘭分韻詩

有序

顧瑛

送郭似山回張公洞

馬臻

遊惠山寺

張雨

連環歌

有序

王逢

朱夫人

有序

王逢

惠孝子行

有序

王逢

秦筆妻

有序

王逢

春申君祠

王逢

哀上萬戶蒙古氏丑斯侯歌

王逢

白龍洞

王逢

惠山夏日酌泉燕集

鄧文原

題馬蹟山

錢淵

哀毘陵

梁棟

題莊伯甯畫

陳叔達

張公洞

楊維禎

借蔣桂軒伯仲及諸友同泛震澤

楊維禎

題小石灣

俞遠

題澄江櫂歌

邾仲義

題溪山勝概樓

陳顯曾

過毘陵

陳孚

江南春

倪瓚

題惠山寺

釋明本

蕭寺早行

許恕

編籬曲

華幼武

遊龍巖三洞之間

周砥

湖上吟

沈貞

常郡八邑藝文志卷十

東里盧文弢纂定

武進莊翊昆新渠氏校補

陽湖莊毓鉉俊甫氏重校

七言古詩

還山吟送沈四山人

唐高適

還山吟天高日暮寒山深送君還山識君心
人生老大須恣意看君解作一生事
山間偃仰無不至石泉淙淙若風雨
桂花松子常滿地賣藥囊中應有錢
還山服藥又長年白雲勸盡杯中物
明月相隨何處眠眠時憶問醒時事
夢魂可以相周旋

春申君祠

張繼

空君入西華
卷一
春申祠宇空山裏古柏陰陰石泉水日暮江南無主人彌令過客
思公子蕭條寒景傍山村寂寞誰知楚相尊當時珠履三千客趙
使懷慚不敢言

雜言無錫惠山寺流泉歌

皇甫冉

寺有泉兮泉在山鏘金鳴玉兮長潺潺作潭鏡兮澄寺內泛巖花
兮到人間土膏脈動知春早隈隩陰深長苔草處處縈迴石磴喧
朝朝盥漱山僧老僧自老松自新流活活無冬春任疏鑿兮與汲
引若有意兮山中人偏依佛界通仙境明滅玲瓏媚林嶺宛如太
室臨九潭詎滅天台望三井我來結綬未經秋已厭微官憶舊遊
且復遲迴猶未去此心祇爲靈泉留

觀放魚歌

盧仝

常州賢刺史從諫議大夫除天地好生物刺史性與天地俱見山
客甲魚烏坐山客北亭湖命北人駕舫子漾漾菰蒲酒興引行處
正見漁人漁刺史密會山客意復念網羅嬰無辜忽脫身上股緋
袍盡買罟獲盡有無鰻鱸鮎鱖涎惡最頑愚鱗魴見幽風質幹
稍高流時白噴雪鯽鯉鯨此輩肥脆爲尤絕老鯉變化頗神異三
十六鱗如抹朱水苞宏窟有蛟鼉餌非龍餌唯無鱸叢雜百千頭
性命懸須臾天心應刺史刺史盡活諸一一投深泉跳脫不復拘
得水競騰突動作詭怪殊或透藻而出或破浪而趨或掉尾子子
或奮鬣愉愉或如鶯擲梭或如蛇銜珠四散漸不見島嶼徒縈紆

鵝鵝鴿鷗鳧喜觀爭叫呼小蝦亦相慶繞岸搖其鬚乃知貪生不
獨頑癡夫可憐百于命幾爲中腸殖若養聖賢真大烹龍髓敢惜
乎苦痛如今人盡是魚食魚族類恣飲噉強力無親疏明明刺史
心不欲與物相欺誣岸蟲兩與命無意殺此活彼用賊徒亦憶清
江使橫遭乎余且聖神七十鑽不及泥中鱗哀哉託非賢五臟生
冤讐若當刺史時聖物保不囚不疑且不卜二子安能諛二子儻
故諛吾知心受誅禮重一草木易卦稱中孚又曰鈞不網又曰遠
庖廚故仁人用心刺史盡合符昔魯公觀棠距箴遂被孔子貶而
書今刺史好生德洽民心誰爲刺史一褒譽刺史自上來德風如
草鋪衣冠與廢禮百姓滅暴租豪猾不豪猾鰥孤不鰥孤開古孟

續三十里四千頃泥坑爲膏腴刺史視之總若無訟庭雀噪坐不
得湖上拔葵植芙蓉勝業莊中二桑門時時對坐談真如因說十
千天子事福力當與刺史俱天雨曼陀羅花深沒膝四十千真珠
瓔珞堆高樓此中怪特不可會但慕刺史仁有餘刺史敕左右兼
小家奴慎勿背我沈毒鉤念魚承奉刺史仁深僻處遠遊刺史
官職小教化未能敷第一莫近人惡人唯口腴第一莫出境四境
多網罟重傷刺史心喪爾微賤軀

走筆謝孟諫議寄新茶

盧全

日高丈五睡正濃軍將打門驚周公口云諫議送書信白絹斜封
三道印開緘宛見諫議面手閱月團三百片聞道新年入山裏螯

蟲驚動春風起天子須嘗陽羨茶百草不敢先開花仁風暗結珠
琲璫先春抽出黃金芽摘鮮焙芳旋封裏至精至好且不奢至尊
之餘合王公何事便到山人家柴門反關無俗客紗帽範頭自煎

皇溪山黃景日寫天吟山靈

山靈

風生蓬萊山在何處玉川子乘此清風欲歸去山上翠仙司下土
地位清高隔風雨安得知百萬億蒼生命墮在巔崖受辛苦便爲
諫議問蒼生到頭還得蘇息否

聞里謠效古歌

李紳

鄉里兒桑麻鬱鬱未黍肥冬有襜褕夏有絺兄鋤弟耨妻在機夜
犬不吠開蓬扉鄉里兒醉還飽濁醪初熟勸翁媪鳴鳩拂羽知年
好齊和楊花踏春草勸年少樂耕桑使君爲我翦荆棘使君爲我
驅豺狼林中無虎山有鹿水底無蛟魚有魴父漁子獵日歸暮月
明處處春黃梁鄉里兒東家父老爲爾言鼓腹那知生育恩莫令
太守馳朱轡懸鼓一鳴盧鵲喧惡聲主吏噪爾門唧唧力力烹鷄
豚鄉里兒莫悲咤上有明王頒詔下重選賢良恤孤寡春日遲遲
驅五馬畱犢投錢以爲謝鄉里兒終爾詞我無工巧唯無私舉手
一揮臨路歧

憶西湖雙鷓鴣

李紳

雙鷓鴣錦毛爛斑長比翼戲繞蓮葉迴錦臆照灼花叢兩相得漁
歌驚起飛南北繚繞追隨不迷惑雲間上下同棲息不作驚禽遠
相憶東家少婦機中語翦斷迴文泣機杵徒嗟孔雀銜毛羽一去

三裴回竟何補

李紳

不風報春春未徹紫萼迎風玉珠裂楊柳未黃鶯
絳舌委素懸香照新月橋邊一樹傷離別遊蕩行人莫攀折不競
江南豔陽節任落東風伴春雪

翡翠塢

李紳

翡翠飛飛繞蓮塢一啄嘉魚一鳴舞蓮莖觸散蓮葉歆露滴珠光

似還浦虞人掠水輕浮弋翡翠驚飛飛不息直上層空翠影高還
向雲間雙比翼彈射莫及弋不得日暮虞人空歎息

茶山貢焙歌

李郢

使君愛客情無已客在金臺價無比春風三月貢茶時盡逐紅旌
到山裏焙中清曉朱門開篋箱漸見新芽來淺煙觸露不停採官
家赤印連帖催朝飢暮匍誰興哀喧闕競納不盈掬一時一餉還
成堆蒸之馥之香勝梅研膏架動轟如雷茶戒拜表貢天子萬人
爭噉春山摧驛騎鞭聲砉流電半夜驅夫誰復見十日王程路四
千到時須及清明宴吾君可謂納諫君諫官不諫何由問九重城
裏雖玉食天涯吏役長紛紛使君憂民慘容色就焙嘗茶坐諸客

幾回到口重咨嗟嫩綠鮮芳出何力山中有酒亦有歌樂營房戶
皆仙家仙家十隊酒百斛金絲宴饌隨經過使君是日憂思多客
亦無言徵綺羅殷勤繞焙復長歎官府例成其如何吳民吳民莫
憔悴使君作相期蘇爾

知軍學士文丈新理惠泉

宋 歐陽修

翠壁刻孱顏烟霞跬步間使君能愛客朝夕弄山泉春巖雨過春
流長置酒來聽山溜響鑑中樓閣俯清池雪裏峯巒開曉幌須知
清興無時已酒美賓嘉自相對席間誰伴謝公吟日暮多逢山簡
醉淹留桂樹幾經春野鳥巖花識使君使君今是樽前客誰與山
泉作主人

送沈景休知常州

沈 遒

鑿鼓翻波返流響雙旌炤地秋日晴蘭陵使君下齋舸都門送客
冠蓋傾使君去從金馬署顏朱髮漆意氣橫十年待詔困囊粟干
騎乞得專名城城居雖小地迺大物眾力薄俗喜爭惠窮遷暴各
有術從來治者難其平使君才勇固自許一州詎足煩神明從容
談笑期月爾坐聽道路傳能聲教行民服已無事乘時預樂與眾
并惠山荆溪兩秀絕丹轂畫筆當春行還有歌詩寫高興賓客誰
許從唱廣

題惠山泉

李邦直

丙午八月朝陽暎繁舟放步來山門萬松森森殿屋聳仰視愈覺

山形尊嚴深谷靜鳥獸樂麋鹿哺子猿生孫泉生石門落石去呱
呱哀響無畏昏挹之甘比蔗漿味淳淳清照魑魅魂正性不專時
節換夏如冰雪冬還溫我知此泉本靈異養奇造化同脉渾有時
精魄應期會坐令一勺彌乾坤氣如蒸炊出山背倏忽四面浮雲
奔一洗萬里原野淨枯株蔓草沾餘恩豈止提攜聚畧缶不獨灌
漑江湖村下爲閒泉上爲雨信哉天下雲雨根

得王介甫常州書

梅堯臣

斜封一幅竹膜紙上有文字十七行字如瘦棘攢黑刺文如溫玉
爛虹光別時春風吹榆莢及此已變蒹葭霜道余與弟奉親樂後
各失子懷悲傷到郡紛然因事物舊守數易承蔽搜姦證繆若

治絮蚤虱盡去煩爨湯事成條舉作書尺不肯勞人魚腹將魚沈
魚浮任所適偶能及我爲非常勤勤問我詩小傳國風纔畢葛屨
章昔時許我到聖處且避俗于多形相未卽寄去慎勿怪他時不
惜傾箱囊知君亦欲此從事君智自可施廟堂何故區區守黃卷
蠹魚尙恥親芸香我今正值雁南翔報書與君倒肺腸直須趁此
筋力強炊粳烹鱸加桂薑洞庭綠橘包甘漿舊楚黃橙綿作瓢東
山故游攜舞娘不飲學舉黃金觴谿如罨畫水泱泱刺船靜入白
鷺傍菱葉已枯鏡面涼月色飛上白石牀坐看魚躍散星芒左右
寂寂夜何長烏棲古曲傳吳王千年萬年歌未央莫作腐儒針膏
肓莫作健吏繩餓狼儻如龔遂勸農桑儻如黃霸致鳳凰來不來

亦莫愛嘉祥

冬日送毘陵暹上人

梅堯臣

霜風刮地如刀鎌，鳥不高飛魚已潛。
何況削髮冷人骨，草履不畏冰雪霑。
緣山涉水去幾里，晝鉢野飯誰人添。
毘陵古寺苦欲到，索我贈詩無久淹。

至秀州贈錢端公安道并寄其弟惠山老

蘇軾

鴛鴦湖邊月如水，孤舟夜傍鴛鴦起。
平明繫纜石橋亭，慚愧冒寒髯御史。
結交最晚情獨厚，論心無數今有幾。
寂寞抱關歎蕭生，耆老執戟哀揚子。
怪君顏采却秀發，無乃遷謫反便美。
天公欲困無奈何，世人共抑真疏矣。
毘陵高山錫爲骨，陸子遺味泉冰齒。
賢哉

仲氏早拂衣占斷此山長洗耳山頭望湖光潑眼山下濯足波生
指倚容逸少問金堂記與嵇康留石髓

無錫道中賦水車

蘇軾

翻翻聯聯銜尾鴉犖犖确确蛻骨蛇分疇翠浪走雲陣刺水綠鍼
抽稻芽洞庭五月欲飛沙鼉鳴窟中如打衙天公不見老翁泣喚
取阿香推雷車

送施厯城辯歸常州

蘇轍

高人不受塵土侵三年浙江藏何深久閒物理有相復厯城官事
森成林乘時斂散逐十二鞭撻逋負徒哀矜一杯相屬未嘗得百
畝歸去將安能潛逃雖出知者後甞勉尙見仁人心歸期忽告三

月尾強畱不顧千黃金河豚雖過鱸鱖在粳稻正插風雨淫酒肴
勞苦罄鄰里期會迫隘思係朋山川失越我所愛扁舟他日要追
尋滯畱未用便相詫半年歲月行駸駸

題惠山寺

焦干之

余愛茲山昔屢遊回環氣象冷清幽茂林鬱蒼翠宴坐瀟灑
風颼颼密鬢積蘚迸泉眼飛翬比翼參雲頭一逕誰開青步障客
來共泛紫玉甌每思乘時好獨往塵纓未濯莫我畱勝處盡至心
未厭健步歷覽氣挾輶生平趣向與時背泉石夙志略已酬茲山
獨以泉品貴乃得嘉名傳九州譬入其中貴有物源深混難窮
搜知公去此久愈愛惠我佳句忘百憂

君山詩

袁默

君不聞吹簫得仙雙帝子宅門敕牌金書字又不聞馬家堂宇色
未昏宅門題作奉誠園古來將相多高第今不爲園卽爲寺吾觀
黃歇相楚時豈復強三千賓客多珠履一旦不謀毋望人身亡家
土何術能令楚復強三千賓客多珠履一旦不謀毋望人身亡家
破神朱英嗟乎養士謾如許得失何異一老兵失墟索寞故城在
庭殿但聞鐘磬聲猿哀鶴怨松風裏遺恨江流終未平

秦望山詩

袁默

海上仙山與凡絕迢迢弱水不可涉烏膺蜂準豈不知長生不死
心未滅雄伯關中亦一時并吞六國猶指揮自矜功德愚黔黎驅

山塞海疑有之吾聞盧生言辟惡真人至又聞徐市言蓬萊藥可
得願捕巨魚連弩射史遷記此不及彼古老相傳恐真是岷峨一
夜失崔巍峨耳山從蜀道來嗟乎六丁汝狂斐區區爲役長城鬼

陽羨沈翠亭

沈遜

江南山川若奔鹿下照江流翠相矚朝望長干暮石牌山頭年年
春草綠我昔常愛江南遊當時少年今白頭人生匆匆寄幻事六
朝得喪唯荒邱陽羨本自江南州水邊孤煙千古愁沙禽關關夜
相呼稻梁自足如何求我生已如不繫舟投老爲誰計沈浮腰間
纓綬亦偶爾此地欣與心相投行歸三吳卜幽隱不復更到枚回
洲漁父丈人莫相笑解帶於此聊遲留

畱趙惠山寺

張商英

咸陽獲璽之明年五月端午予泛船二閘新成洞常潤鱸練直貫
吳松川淮南枕師初入浙借問邑里猶茫然茶經書說惠山泉海
內知名五十年今日親來酌泉水一見信異傳聞千置茶適自建
安到青杯石臼相爭先輾羅萬過玉泥膩小瓶蟹眼湯正煎乳頭
雲腳蓋蓋面吸嗅入鼻消睡眠滌釜探壺貯甘液緘題遠寄朱門
宅仙人見水是璫璃迺知陸羽非凡客

感歎

鄒浩

一犬捕執將祭神羣犬隨之號極聲惡傷其類乃如此雖至苟賤
亦有情人於天地最爲貴詩書禮樂開聰明推恩尙欲極萬物而

況等列皆簪纓奈何心忍所不忍相殘相賊爭功名因知微畜反
可尙使我感歎無由平

題惠山泉

黃庭堅

錫谷寒泉掬石俱併得新詩蠶尾書急呼烹鼎供茗事澄江急雨
看跳珠是功與世滌羶腴令我屢空常晏如安得左幡清潁尾風
爐煮餅臥西湖

糖井旁
山石

陽羨葛亞卿爲海陵尉作葺春軒余爲賦之 韓 駒

昔聞先生隱吳儂當窗十里橫烟峯今見先生爲楚吏繞牆四面
縈烟水從來楚俗帶吳風曲折徑路深房櫳舍前繫船柳千丈舍
後參天竹萬叢千籤插架似蓬館白拂挂壁如僧宮掃地挾香欣

客至羹魚飯稻愁樽空不瀾不清惟寂寞大笑先生致身錯青山
猶作布衣心朱門却有田居樂筆回造化天工怒胸包今古時人
誇甘窮自許元次山蹈海還尋魯仲連吾曹一歎豈易得世間百
歲俱可憐何用北窗翻巧策且向東亭美春色我當酌酒壽主人
詩前飛下雙鴻鵠

送毘陵太守劉君受代東歸

汪藻

往年我作新安民人人能說劉使君使君本一儒者耳數十年來
嗟未聞我時屈指今州縣似此賢侯當識面那知漂泊千里餘晝
戟清香日陪宴使君何以人不如胷中正有萬卷書清真簡淡乃
天性文章政事猶其餘向來天子畱君住重與毘陵三萬戶誰教

一曲渭城歌忽作梨花枝上雨宦游南北安得同撫循凋郡還須
公人生五馬亦不惡與民處處爲春風

次韻過顧子美話舊因遊惠山

汪藻

放船出郭溪渾渾乘潮夜到君家門潮頭細卷落花雨溼櫓不驚
春夢魂君家難忘復易識依然井徑當邱樊向來惡子下闕處繞
屋但見清陰繁飄零懷抱少傾倒一見故人如故園嗟予何因得
之子舊事請自鍾陵論鍾陵當日盛游集往往前輩風流存嘯歌
雖容阮籍逸人物不數王融謾我時三十君始壯矯矯兩鶴俱乘
軒大兒洪徐小兒向此外餘子何勞吞龍沙買酒醉秋月倒牀但
聽長江奔祇今相去能幾日世事反復那勝言一官得謫大如屋

五年乞米供朝昏，願疑造物乃知我。欲使晚節窮彌敦，君看靜躁不同者。王孫願肯還爲猿，飲酣起步青松根。共瞻佛宇諸峯尊，席邊政喜泉漱壑。風外已復烏嗁村，箇中好著我輩人。寄與石上雷

注

菴畫谿行四首

孫覲

老枯浮鼻水中歸，綵雉應媒桑下飛。蘿爲冥冥山四起，數家雞犬煙樹裏。一支新綠漲晴溝，楊柳中間繫小舟。菴畫谿頭烏鳥樂，呼風喚雨不能休。

蝶趁花飛爭入坐，倚空百尺游絲墮。亂山街日半船明，斷雲載雨前村過。蕨芽戴土小兒拳，漁市人歸柳貫鮮。菴畫谿頭人語好，烹

魚煮蕨餉春田

沙頭綠暗已藏鴉竹裏猶殘一兩花
蝸廬抱柳開新國燕語窮簾
憶舊家春風有信自年年
罨畫谿邊柳繫船陶情滿滿酒如泉
醉與長餅藉草眠

翠木蒼藤綠白沙
槿籬茅店野人家了無狡兔營三窟
只有黃蜂趁兩衙
樹頭獵獵酒旗風
罨畫谿邊賣酒翁
銀餅快瀉清若空
令君一笑面生紅

陽羨春歌

陳克

石亭梅花落如積
吐飯爛斑竹姑赤
祝陵有酒清若空
煮粳蒸魚作寒食
長橋新晴好天氣
兩市兒郎權船戲
谿頭饒鼓狂殺儂
青

盤紅裾偶相值風光何處最可憐邵家高樓白日邊樓下遊人顏
色喜溪南黃帽應羞死三月未有二月殘靈龜可信滄水乾葑草
青青促歸去短簫橫笛說明年

雪夜尋梅

楊萬里

去年看梅南溪北月作主人梅作客今年看梅荆溪西玉爲風骨
雪爲衣臘前欲雪竟未雪梅花不慣人間熱橫枝憔悴涇晴埃端
令羞面不肯開綺裙夜訴玉皇殿乞得天花來作伴三更滕六駕
海神先遣東風吹玉塵梅仙曉沐銀浦水冰膚別放瑤林春詩人
莫作雪前看雪後精神添一半

謝尤延之提舉郎中自山間惠訪長句

楊萬里

淮南使者郎官星瑞光夜燭荆溪清平生龐公不入城令我折却
屐齒迎交遊雲散別如雨同舍諸郎半爲土二老還將兩鬢霜三
更重對孤燈語向來南宮綾錦堆南窗北窗桃李開先生誦詩舌
起雷一字不似人間來剡藤染出梅花賦句似梅花花似句幾年
金鑰祕銀鈎玉笈不施恐飛去秋風呼酒荷邊亭主人自醉客自
醒儂能痛飲渠不飲飲與不飲俱忘形鬢今如霜心如水功名一
念扶不起儂歸螺山渠惠山來歲相思二千里

毘陵郡齋追憶鄉味

楊萬里

坐無黃雀牛尾狸荆溪日日思江西若無鵝梨與海錯江西却恐
思荆溪舊居江西不自惜到得荆溪却追憶明年官滿歸江西却

憶荆溪再難得江珍海錯各自奇
冬裘何曾羨夏絺鶯黎黃雀無
不可荆溪江西不關我

太平寺畫水

楊萬里

太平古寺劫灰餘夕陽惟照一塔孤
得得來看還不樂竹莖荒處
破殿虛偶逢老僧聽僧話道是壁間畱古畫
徐生絕筆今百年祖師相傳妙天下
壁如雪色一文許徐生畫水纔盈堵
橫看側看只麼是分明是畫不是水
中有清濟一線波橫貫萬里濁浪之黃河
雷奔電卷儘渠猛獨清元自不隨他
浪痕盡處忽掀怒攪動一河秋色暮
分明是水纔是畫老眼向來元自誤
佛廬化作金柁樓銀山雪堆風打頭
是身飄然在中流奪得太乙蓮葉舟
僧言此畫難

再覓官歸江西却相憶并州剪刀剪不得
鷺溪匹絹官莫惜貌取
秋濤懸坐側

歲之二日欲遊翟園因寒風而止

楊萬里

歲前問尋翟園梅不知作麼不肯開
歲後遣人訪消息春風一夜
花初坼老夫聞此喜欲顛
小兒終夕不曾眠南烹北果手自釘
漆欄銀瓶色相映千騎朝來填戟門
雙旌已復指梅園東風無端動
地起橫作清寒止游子老夫孤悶搔
白頭小兒勸翁翁勿愁人言
好事莫作意雨如風憎鬼神忌欲游
不必言阻游不必計從今只
揀天色佳走就梅花求一醉

華堂秀才著六經解以長句書其後

楊萬里

河圖三畫已贖著堯典萬言猶欠却向來潛聖天何言六經非渠
一手作杏花壇下撥不開天公更遣麒麟催乾坤造化登青竹洙
泗光芒付綠苔堂上書生真苦相蠹簡穿渾不放屋上架屋更
屋上後千萬年作何樣華元夜登子反牀華堂晨趨孔子堂當時
浪說析骸骨今日覃思雕肺腸華君將身博凍餒毛穎可憐彼何
罪君不見老農驅牛耕壠頭稻雲割盡牛亦休毛穎爲君禿盡髮
問君何時放渠歇短檠青燈明復滅

曉經潘葑

楊萬里

油窗著雨光不溼東風急轉西風急蓬聲蕭蕭河水澀牽船不行
人却立雨中篙師風墮笠潘葑未到眼先入岸柳垂頭向人揖一

時喚入誠齋集

惠山雲開復合

楊萬里

二年常州不識山
惠山一見開心顏
只嫌雨裏不子細
髣髴隔簾青玉鬢
天風忽吹白雲坼
翡翠屏開倚南極
政緣一雨染山色
未必雨前如此碧
看山未了雲復還
雲與詩人偏作難
我船自向蘇州去
白雲穩向山頭住

題陸子泉上祠堂

楊萬里

先生喫茶不喫肉
先生飲泉不飲酒
飢寒祇忍七十年
萬歲千秋名不朽
慧泉遂名陸子泉
泉與陸子名俱傳
一瓣佛香炷遺像
幾多衲子拜茶仙
麒麟圖畫冷似鐵
淩煙冠劔消如雪
慧山成塵慧

泉竭陸子祠堂始應歇山上泉中一輪月

送袁和叔尉江陰

樓 鎬

澄江少日曾經行高城傍有長江橫君山特立江之汀下瞰洵甸
一堂平申港引潮深無聲萬頃灌注滋農耕戰國今幾二千齡黃
歇此地猶垂名舊以邑屬南蘭陵疲于奔命吏失甯今焉裂地爲
專城獨當一面行雙旌井市雖小民厚生四十萬緡輸賦征舶商
輻湊眾貨贏牒訴簡省官曹清一邑負郭相依憑守宰同僚齊弟
兄脈絡貫通易盡情尉職無卑近編氓坐閱是否真權衡傍郡孔
道困將迎我乃靜趣如郊垞安輿並行人子榮況有海錯供庖烹
河豚鱠魷鮮不鯉車螯蛤蟹均藜藿夫君傳家有典刑父子知已

人一經詩書滿門不慙卿豈羨漢土黃金籛薦口久已徹帝京九
萬自此開鵬程平生寒臆照短檠興亡千古無遁形妙年射策當
彤庭歸領後生爲主盟友朋講習誠專精世故多端須飽更京口
直下連滄溟官府濶稀行旅驚邊頭久無夕烽青要在彈壓潢池
兵簿書期會勤經營人物酬應審重輕一言之可終身謹毋失
已毋失人贈人以言豈吾能頗嘗于此三折肱舉以送君君試聽
尤延之侍郎屢求作遂初堂詩詩未成延之去國因以奉送

陸游

印何纍纍綬若若只堪人看公何樂忽然捩柁開布帆慰滿生平
一邱壑遂初築堂今幾時年年說歸真得歸異書名刻堆滿屋欠

仲欲起遺書園舍之出游公豈誤綠髮朱顏已非故請將勲業付諸郎身踐當年遂初賦

孫元可賦張公石室詩句語險怪辭鋒秀拔讀之如神遊洞府而陵果爲之奔屬也非身行此洞不知此詩之工蓋其質似盧仝而文麗多之如又加鞭當千里一瞬其視劉叉馬異得名浪矣詩文與我過當誠無足以當之牽韻勉酬眞添薪煮質之舉

薛季宣

君不見談天衍有言九州之大惟一州無論青冀并營幽我其放言學鄒子將子聽之無我尤我騎一紙白驢子跼梯跼踏走上南山頭萬里以意行一息不暫畱谿衍到空洞且作秉燭遊呼來混

沌老蝙蝠爾作精怪我則不從教激風怒竅拔木折石一去句有
五日而後返但是有戶則可由積蘇累塊雖云巧達觀只與蟻壤
侔我有五雲車駕以六蒼虬日月行已揭無人觸虛舟何曾見爾
懸旌鳴佩朗裝欲飛動玉柱校立直以修大撓甲子有窮盡爾乃
祿命難考求皇天大地僅若一雞子金烏玉兔銜得曉夜作箭浮
我不知爾許事政覺兩耳風颺颺託死不復生一死可作道者流
況乃漢時五斗米師星河耿雙眸石壇一坐一千歲坐視生滅水
上漚水上漚且罷休休無休於無作樂無樂於無愛仙人與世人
壽夭如相齟爰清爰靜爰自正此舉獨步不可儔信是神仙足官
府蜂房戶牖封君侯我偶作此言不比亦不周爲何孫卿子謂我

阮與劉爲我謝孫子我才愧爾天一甌不如且飲酒耳熱從歌謳
可以銷遣綿綿不斷萬古之悲愁悲愁銷遣幾時盡萬古之後重
有萬古來悠悠

殺虎行謝宜興趙大夫惠虎皮虎腊虎睛

劉宰

君不見陽羨周將軍射殺南山白額虎千古萬古聲流聞又不見
宜興趙大夫南山三十有六虎令行殺取無復餘一虎昔何少三
十六虎今何多虎多人不患所患政之苛苛政滅人門猛虎戕人
命擇禍莫若輕泰山之人論已定大夫性高明下令走風雨所知
在田里了不見臺府既令民免政之虎又與民除虎之苦四境之
民歌且舞或云殺虎太傷和胡不令渠自渡河我聞此言笑且呵

大夫憂民憂豈必限吾土不然鄰國以爲壑信也白圭愈於禹古
陽羨今宜興大夫邑之主將軍邑之賓主賓多寡事不同千古萬
古同清芬

喜晴呈葉常州

張安國

使君憂民出至誠欲晴而晴天所矜白衣老人無逢迎香火未收
東方明指麾六龍扶日行羣陰捲盡見太清女擷柔桑男趁耕嬉
嬉和氣滿春城去年歲事已如許田頭試聽老農語浙西更著五
日雨麥根爛盡種不土

謝毘陵使君惠畫

袁燮

都尉風流貴公子結交海內知名士磨礪禁巒驕侈習雅意登山

與臨水十幅煙江疊嶂圖當時展玩忘朝晡此畫如今寧復有我
來薄宦大江濱無價之珍俄入手一山雄特倚天立下視羣峯如
拱揖斷崖飛出玉虬龍元氣淋漓鬼神泣山中喬木堪棟梁山外
煙波凝翠光數間野店傍林樾一葉扁舟浮淼茫往時只誦蘇公
句想像都尉圖中趣豈期今日見逼真端與前輩同機杼自憐老
大無他求塵勞羈絆空悠悠安得千巖萬壑裏尋幽擇勝逍遙遊
我心欲往足無力縱觀此畫如親歷毘陵使君真可人嘉惠不啻
千金直平生辭受關鑰嚴茲焉詎敢傷于廉毘陵萬口皆歸重道
義相與吾何嫌

題慧山諫師竹軒

袁植

子猷喜種竹太白喜乘月俛仰雲泥問勝事俱清絕況乃吾廬幽
風煙浩一邱竹虛能受月華白月白能牽竹翠浮不應玉壘李太
白長對山陰王子猷未攜花下一壺酒已登殘夜水明樓人間好
景四并難無如月下青琅玕影搖金瑣碎光動劒芒寒魂醒耿不
寐哦詩坐長歎

題惠山

蔣重珍

龍山惠山兩山雲出能爲雨入爲晴雲山之氣有斂散斂散之理
斯爲神我廬山下爲小隱雲爲動兮山爲靜悠然而出物之澤屹
然而峙地之鎮我見雲山喜與俱雲山無情不見余我比雲山多
此見不如一似雲山無

毘陵太平寺畫水呈王君保使君

畫水下府志有天
慶觀畫龍五字

戴復古

何人筆端有許力捲來一片瀟湘碧
摩挲老眼看不真怪見層波湧
虛壁天慶觀中雙黑龍物色雖殊妙
處同能將此水畜彼龍方知畫手有
神通龍兮水兮終會遇天下蒼生待
霖雨

毘陵天慶觀畫龍自題姑蘇羽士李懷仁醉筆詩呈王君保

寺丞使君

戴復古

姑蘇道士天酒星醉筆寫出雙龍形
墨蹟縱橫奪造化蜿蜒滿壁令人驚
一龍翻身出雲表口吞八極滄溟小
手弄寶珠珠欲飛握入掌中拳五爪
一龍排山山爲開頭角與石爭崔嵬
波濤怒起接

雲氣不向九霄行
雨來萬物焦枯天作旱
兩雄壁隱寧非懶
真龍不用只畫圖
猛拍闌干奇三歎

題玄妙觀主程南溟所藏馮太守蓮花圖

元張以寧

往時毘陵二千石能作池荷世無匹
揚州真館驚見之江水江雲動
高壁紫臺石出羣仙朝露洗扶桑
曉霞赤翠蕤絳節光陸離漢女
湘妃失顏色就中一箇異姿格
彤霞酒銷雪色白道人一笑三千
齡太華秋風語疇昔憶子濯足江
上游浩歌小海無人識荷葉荷花
夢裏香倦遊見畫三太息君當取
此葉爲舟凌厲南溟觀八極暮年
賀老乞身歸分取鑑湖千頃碧

劉常州宅對菊醉歌

柳貫

菊花高株高一丈葩萼垂盂葉承掌攬先節物作重九亂點秋光
入屏幌黃黃白白鬪新品大朵如擎小如仰或稽紅紫當獨秀詎
識幽嫺無競爽天工似爾費雕刻人力可堪專灌養京華樂事全
盛日隙地買栽隨意賞誇多直擬衛霍室豈顧家微百金享常州
使君開畫堂簷網連楯出虛敞集芳作譜爲娛賓賴有筵前玉舟
兩不知誰舸載傾城但道我屋無藏鏡過從數客問前茅出節何
時試英蕩可能輕別負芳期遂使寒香淪宿莽孤根有託俟歲晚
急景如流嗟運在我歌君飲君當酬明日霜河催去漿

奇題惠山華氏溪山勝槩圖

柳貫

山如尊卣溪如籥洗刷秋光出深秀市塵飛不到亭皋翠幌朱簾

閒白晝主人宴坐與天遊收拾至樂歸之酒絲管悒悒大雅筵荃
蘭泥泥離騷圍以心觀心迺如此更爲溪山發神腴水榭寒開尋
丈間物華掇出雕鏤手客來問石石忘言客去畱雲雲爲守惠山
山中第二泉水品古今誇滿口井幹餘泣溢爲瀾落毳飄來鳥驚
救高人但取一賞足擇勝誰能占幽茂兩腋清風起振衣百年陳
迹供回首寄聲鷗鷺莫相疑還我靈龜養耆壽

夜宿太湖岸

曹伯啟

太湖西望如滄溟木落霜寒波更清聞道是中多巧石明朝豈用
勞生靈晚風作惡蛟鼉走搖蕩乾坤洗星斗大隱乘舟不見人而
今盜賊爲淵藪

題江陰邱文中山水圖

貢師泰

老龍渴飲池中墨飛上半天成崩劣雲煙著地疑不開白晝神驅
太陰黑筆端巧奪造化功咫尺峯巒千萬重長林似洒楓葉雨虛
亭不動松花風隔江更有山無數江上扁舟纔半渡他年白髮許
重來爲君別寫容城賦

題毘陵承氏家藏古錢

吳萊

我觀泉志頗識錢古今錢品不一傳歷山鑄金史靡紀泉府職幣
開其前五銖半兩日以變榆莢鵝眼爭相緣重輕子母信有制周
郭肉好俱完全吾知聖人利用世要在百貨得懋遷農夫紅女實
不易尺布斗粟儲爲淵嗟哉後王弊自此竟使匹庶握利權翦皮

鑿鏐偽莫禁執籤障篋怪稱賢國儲何當調度足民食矧是齏鹽
先潛交鬼神欲著論臭街富貴仍開鄜冶卒銅工各鼓鞴偏鑑盜
鑄多烟燧一朝變通別改幣餘盡沈朽徒埋船承君好古此收拾
寶玩有若編埒然大貝南金特嗇厚元圭博璧同瑛鮮漢官受一
潔簠簋晉士挂百酣栝捲白水真人笑有識上清童子猜非僊古
錢勿用幸久聚古貨難賣空精甄時能撫摩却穢夢坐與饕濁收
饒涎世間萬物裹可盡牀腳一甕踏欲癩試看營室鎮星處何似
揚州騎鶴年

惠山寺九龍峯下酌泉

周權

惠山鬱律九龍峯磅礴大地包鴻濛劃然一夕震風雨欲啟靈境

昭神功六丁行空怒鞭斥電火搖光飛霹靂一聲槌破老雲根嵌
洞中開迸寒液道人發玉深護藏鏡涵萬古凝秋光陸翁甄品親
試嘗翠浪煮出松風香我來山下討幽境自挈瓶罍汲清冷味如
甘雪凍齒牙紺碧光中敲鳳餅昏塵滌盡清淨觀心源點透詩中
禪亟呼陶泓挾玄玉揮灑字字泉聲寒投閒半日聊此駐孤權明
朝又東去紅塵人世幾浮雲鐘鼓空山白朝莫

荆溪橋

仇遠

荆溪滔滔向東注長橋束之川后怒英風颯爽白晝分此是孝侯
斬蛟處客船逆上帆下檣何如懸水泝呂梁百篙攢石雙檣健進
退咫尺千丈強我來偶值凍雨作且近孝侯祠下泊平生忠孝侯

所知世途更似風波惡

餞謝子蘭分韻詩

有序

顧瑛

至正戊戌秋九月毘陵謝君子蘭過玉山中謂子曰僕旅寓合塘之上今年夏秋苦霖雨田皆白波與陂湖相通所居復卑下老妻稚子不遑寧處兼乏樵蘇之所今於泗川里得屋一區主於友人管伯齡其里亢爽宜禾麥子乃攜硯田而就耕焉故來言別子遂置酒於書畫舫邀恢公復初袁君子英陸君元祥朱君伯盛以江東日暮雲分韻同餞余得東字子蘭得江字亦賦詩畱別餘字各有所屬云

先生祖實康樂公于今爲庶稱老翁派流白鶴溪上住鄉里羣豪

趨下風叩門過我驚我僂頭戴笠子心忡忡談空說有邱壑志抗
塵走俗山澤容自言千里竄荆棘此身飄泊如飛蓬山妻未老髮
半禿絢鍼主饋全婦功大兒學詩次學禮小兒五尺儒門童前年
去年兵蔽野單堠雙堠人舉烽孤舟如葉載雨雪朝浮暮泛西復
東寒蠅穴窗死鑽紙泥龜曳尾生脫筒只今儼屋在美里黍穗雨
黑波搖空米如買珠薪束桂壞壁四立鳴哀蛩杜陵遷居憂國難
阮籍命駕嗟途窮鴉鴉無枝無所寄烏鵲三匝將奚從結心泗川
得管子爲借一畝幽人宮我爲斯文雅識面遲遲細語傾深衷我
開船屋秋水中綠波碧樹紅芙蓉推窗面面遠山入引鉤箇箇游
魚逢好事獨許米老得清賞當與岑參同畫張神筆駭瘡鬼書著

芸香辟蠹蟲槽頭夜滴百斛酒佳菊爛發花叢叢蟹斫兩螯白雪
滿橋摘並蒂黃金重薦君之酒餞君別莫辭大酌玻璃鍾君不見
繞屋水流流入淞五湖四海三江通君歸只在泗川上百里那消
風一逢君好去莫忽忽足衣足食可御冬回首虹光貫明月新詩
多附高飛鴻

送郭似山回張公洞

馬臻

春風吹沙春草長雜花媚煙飛野香幽花裊裊泣雨色人間光景
勞中腸赤城老仙呼鶴起迢迢直度太湖水玉洞碧桃疑古芳玄
扃窈窕羅綺綺吟詩贈別情相關霧節風幢幾日還歸來無語生
幽寂嗚鳩一聲春晝閒

遊惠山寺

張雨

水晶古來差第一天下不易第二泉石池漫流語最勝江流湍激
非自然定知有錫藏山腹泉重而甘滑如玉調符千里辨淄澠能
賈百年離寵辱虛名累物果可逃我來爲泉作解嘲速喚點茶三
昧手酬我松風吹兔毫

連環歌

有序

王逢

連環歌爲杜先生夫婦而作也先生諱友開字陽父世居江陰
之君山教授數十年資束脩自奉妻吳辟纊以助之天厯間菑
荒學徒散去先生竟餓死初吳昆弟屢勸斬邱木弔墓地可少
延性命先生在羸瘵中堅持不可繼欲挈吳以歸吳曰夫旣盡

孝妾獨不以義自處甯不食若粟遂相枕藉而卒後十一年逢過其里獲見一古研乃先生故物其銘曰置之而水凝淒然其似秋噓之而露泣熙然其似春惟有德以自潤能不言而詔人何以觀之吐墨如雲觀此益信其行噫先生之計善矣當是時穀價踴貴人食樹皮糠覈非困於飢則殆乎殄矧二者罹於垂老待盡之日必料邱木與墓地不過易斗斛粟活旬日而死寄客土且身受不孝之名尙從父母爲地下遊乎先生卓然先見者以此吳生爲士妻共患難同貧賤道也夫旣委順於正又肯愛餘齡就食昆弟哉抑以昆弟之言非導人歸於義者也吳判然不移下從良人者以此噫亦義矣哉使二人有裹飯一君子

則天理人倫未必章章鄉里況天下耶逢懼歲遠而事泯也故
序而歌之歌曰

白玉雙連環瘞在春申山山前夫婦義同死心與連環鎮相似日
月合照無欠虧天地相依共終始天地日月非彈丸環兮環兮冰
雪寒

朱夫人 有序

王逢

夫人諱元琇江陰知事朱道存之妻都漕萬戶費雄之女也至
正十六年江陰亂夫人依其父居松江之上海未幾上海縣陷
苗軍復縣大掠夫人驚遽出臥內時苗手刃以入將犯之夫人
怒叱曰吾貴家女貴家婦夫君見勤王汝本官兵奚爲犯我投

叙珥於地苗攫之去旣苗杳至索貨無有遂驅迫就道夫人揆不免乃攀堂楹厲聲曰吾義不辱苗狗忍辱我耶比遇害爪入楹木血沁於指哀哉始先君庫使解官歸里逢適主於其家每與盛宴輒缺然若不甘者知事言其故於夫人它日復宴夫人親爲別具饌命子文博文禮昇示逢曰此奉尊翁自是以爲常明年逢過其地嗟夫人之生也柔惠足以德於人歿也貞烈足以表於世謹爲辭以弔之辭曰

青鬢花白浦水黃雲日艷慘風悲涼停轆西向三酹觴旌旌葆幢來混茫若有人分凜如霜星流電馳惟可望微言夙習大洞章功成拔宅居帝鄉鵲河蟾鏡肆翱翔笑按北斗挹酒漿帝曰欽哉無

大康下爲叔世扶綱常進規退矩禮自防釵荆裙布今孟光尊姑
養之植德堂堂階珠樹聯瑤芳明璫蒼珮森琳瑯搥鐘考鼓樂未
央楚氛遮天耀天狼飄然歸甯父母傍正坐漆室憂葵傷官兵寇
我加劍鏃昊天倚杵海變桑身有濺血無回腸烈婦殉節死固當
名與黃浦流俱長稽首再拜淚雨滂漚焉直上驂鸞鳳

惠孝子行

有序

王逢

惠孝子名連字子及曾大父疇累遷寶章閣待制常德知府致
仕司農少卿卒翰林池聖夫銘其墓曰金玉其相表裏無僞槩
可見矣子及受學於陸子方先生嘗述江革郗鑒二贊其贊江
有曰兒力甚武母安勿怖兒身旣豫養不可窶前行弗獲後顧

則逼我心欽欽卒與盜卽母兒一身安能異塗兒亡母亡將焉
用仔其贊祲有曰民儉於食累累爲瘠推活君子職敬惟德君
不苟括念我一兒骨肉之恩生死共之弗卹爾生胡後而死亡
志弗獲全是口體士矜誦之後江陰亂挈母命及諸甥姪間關
百罹避地吳下逢嘉其言行贈之以詩

吾邦有龍虎村中有宋朝司農惠公之曾孫司農三登巍科蚤選
衛王增兩作茂宰一出漢朱轡百年雲散金碧氣衣冠禮樂八九
存曾孫自號轆轤生又號蹇連子負材弗施甘與世相忤未嘗入
城見州尊或逢夸毗徒掉臂決去如林狼日但讀書蓬藁門講畫
授弟子愉覽問清溫堂前植橋堂後樹萱百畝之田五畝園征夫

道賜馬汗赤抱膝方看高
鳶養優哉游故樂難諉游兆
涖灘歲天
狗闕邱樊達官大家驚潰奔
水鮪陸虞盡啗吞是時輶輓
生悒優
磨屢捫非不能持挺刃佩猴
肫靖鄉國清札昏母年八表
罔極恩
外甥在侍旁無援誓全古孝
義坐使薄俗敦攜扶于野蹇
涉于暨
慘冒霧露飢採稻粃妻孥臬
兀兵火際亦解委曲奉壺殮
天道昭
著神佑護卒得命脫蟻聚并
蜂屯寇連子蓋嘗口撰江革
郗鑒二
贊累百言文燄炳若星斗繁
聞諸人臬者襪魄示諸人境
者喪魂
江郗名與垂乾坤
乾坤蕩蕩敞帝闈
我歌三反烏滿原
春風一夜
回孤根

秦筆妻

有序

王逢

筆子里人也乙未亂挈妻依同郡朱判官瑀居吳中筆病卒貧
無以斂朱爲具棺衾且思所以卹養其妻其妻覺泣謝曰良人
筆生以藝游搢紳間詩書禮義之教妾亦與聞之矣妾以未亡
洵有累於鄉長者在長者爲義妾其於義何朱加慰之夜漏半
哭益哀遂自經筆死所朱合葬焉

良人賣筆芙蓉市交接無非大夫士詩書禮義言熟聞冰霜松柏
操笑云亂餘良人死君託恤寡見君尤不惡願君葬妾良人邊夢
中雙報筆如椽

春申君祠

王逢

昔年大邑封江東意氣傾奪何其雄今朝送客過祠下感慨令人

愁萬重頽垣敗屋鳴寒鼠千載寥寥竟無主
片言曾見報強秦一計那知失于楚
古來辯士多殺身用智得愚良苦辛三千珠履今
安在門外青山解笑人

故將軍歌

有引

王逢

故將軍歌
夷上萬戶蒙古氏丑廝侯也侯字靜如以世勳佩三
珠金虎符官昭勇大將軍鎮江陰謙恪尚義人悅慕之至正十
一年淮西亂督軍九江取道安慶時湖廣威順王在道王聞侯
頓兵卽帳下以退守地虛弱強侯爲張飲之會宣讓王遣使諭
旨曰安慶控淮江要衝命侯就鎮前後出師凡二十九捷十二
年冬十一月寇悉眾水陸竝進侯連破之翌日復大破輕舟追

後中流矢卒是月二十九日也二王哭之哀給白銀五十兩賻其葬先是逢與宴侯第時海內無事嘗謂侯曰太歲在辰侯當保障一方戰勝後恐不利盍慎諸侯答曰大丈夫勦力王室死無憾也侯事親孝征閩寇衛漕咸有功云

將軍舊乘青驪驕蒼龍金虎雙輝光揚旌伐鼓靖閩徼山鬼迸落黃茅岡長鯨喊呀欲東噬以身扞海民樂康十年楊柳蔭環堵一夜苜蓿空沙場淮江蕭條咽流水殺氣妖氛互彭蠡提兵假道古舒州親王遮畱勞玉趾王言二邊賊緣蟻將軍不止我其死月氏觸髅酒歎升諾重泰華輕邱陵儲胥孤懸使雜守睥睨危急期先登崔蒲嶽嵐開金翅篔簹竹深深攢鐵菱長驅大捷二十九生俘千

人梟萬首猙獰健兒駿奔走電掣雷訇若神投東南瘡痍合未蘇
終焉性命豺狼有仲冬炎風動地吹太陽血赤芒星垂將軍百射
百中之弓撥矢鉤天爾爲黃蕉丹荔空芳菲保障千里今誰祠霜
繁雪稠侯我思

白龍洞

洞在江陰南門外由里山宋知軍范宗古建龍王堂於此

王逢

開元年中關輔旱靈岳神祠禱幾遍少監馮生能畫龍明皇命試
新池殿落筆蜿蜒勢未已素鬣冰鱗溼如洗池波洶湧雷電驚雲
氣之間白龍起吾觀馮豈作霖人畫龍能雨疑有神深山大澤多
窟穴不應杳渺不似眞澄江接海連空白泓深當是神龍宅螭虬
狡獪非其倫河伯江妃敢驅役霜鎖煙關晝不開時傾膏雨蘇民

災一爐香火動誠意風馬雲車天際來吾聞澤國多水患淮甸地
乾多苦旱願均神力遍四方無令水旱常相半

惠山夏日酌泉燕集

鄧文原

我生懶拙百不堪放意林壑窮幽探茲山九龍勢飛動鬣錯落
盤松栴高風吹衣凌險遠太湖渺渺天西南泉流不逐湖波逝融
爲冰鏡開塵函六月火雲生熱惱三嚙冰雪開清甘試將水品證
泉味一語須喚山僧參層臺桑苧肖遺像古屋彌勒空香龕五年
兩歷惠山頂未辦草具來卓菴白鳥翻風導先路碧雲垂地隨歸
驂酒醒呼枕聽風雨老龍卷水空溪潭撫掌歡游已陳蹟隱隱孤
舟沈暮嵐

題馬蹟山

錢淵

七十二峯浮震澤中有一峯名馬蹟云是祖龍神馬經四蹄石上
如雕畫西青崖畔盡桃花暖風遲日蒸紅霞柴門流水自村塢幽
花籠畫春長嘉行行內閣相咫尺六月風吹楊柳陌千古猶傳避
暑宮躊躇往事空陳迹誰家種竹滿塢深猗猗晝日長陰森行人
過此消塵慮耳邊惟聽鳴瑤琴長橋曲水村塢小茅屋人家往來
少綠陰黃鳥嗷一聲落花滿地無人掃亭亭午日正暄妍方塘水
淺羣牛眠禾麥高低家富足百年涑水遺風傳日墮西巖村欲暮
殘紅返照林間樹賴肩樵子倦歸來山路雲深不知處越王敗餘
城已覆新城知是何年築夜深人有讀書聲月上女牆猶未宿村

西汨汨流芳泉湖濱日泊漁人船魚鰕朝來爭作市酒家門巷青
帘懸蓬坑寂寂春無主軟藤花落閒亭午小橋流水澗東西茅屋
藏春春幾許檀谿一派清泉分蒼崖白日波沄沄臨流飽玩坐終
日知是當年誰隱君苦竹叢深橫古渡渡頭芳草迷煙霧魚龍噴
沫水雲腥十里風帆送朝暮東谷盡處是鉅埼村深地僻行人稀
日長無事門半掩白鷺羣飛水滿溪丹崖翠壁千仞縹瑤草琪花
四時好山中別是一乾坤尋真何必蓬萊島

哀毘陵

梁棟

荆溪水腥泊船早落日無人行古道觸懷有眼不識春東風吹出
青青草荒基猶認是人家敗柵曾將當城堡當時壓境兵百萬不

脫鞞尖堪蹴倒短兵相接踰四旬毒手老拳日攻討內儲外援兩
消沈一縷人心堅自保孤臣守土輕性命赤子效死塗肝腦朝廷
有爵媿降附幽壤無恩澤枯槁願箋司命錄英雄收拾忠魂昇穹
昊

題莊伯甯畫

陳叔達

故人秦履山中住狗吠雞鳴萬家聚畫圖烟景彷彿同索我新詩
寫幽趣我憐此山如削玉波光平浸嵐光絲勢如羣馬爭後先一
峯欲斷一峯續樓臺掩映湖水邊簷有長松澗有泉垂竿絕勝嚴
陵瀨載酒頻來賀監船君家結構山之趾既學爲農又爲士秋風
禾黍春桑麻白畫琴樽夜經史客來小酌開軒窗侑觴不用呼紅

妝雲巒對面列屏障松濤夾耳鳴笙簫監與暇日閒登眺尋徑經
邱無不到興來隨意坐莓苔一壺醉倒掀髯笑無官縛身忘寵辱
有子承家萬事足水兮可漁山可樵田兮可耕書可讀有時放歌
出烟渚買得鮮鱗就船煮白鷗飛處水如天黃鳥鳴時花似雨當
年訪君曾命駕一別于今幾春夏鬢毛未盡鏡中霜不見湖山見
圖畫我因親老乞歸田君未龍鐘亦引年卜鄰儻許營茅屋共結
青山綠水緣

張公洞

楊維禎

五月八日記遊仙三十六天洞靈洞中窗戶夜不扃地底風雷
日相哄巉巖靈骨誰手鑿納納虛衍曷時頽龍顛虎臥絡薛蘿委

蓋垂旃挂鸞鳳，莖高玉屑陳。金柁窪陷瓊漿流，碼瓮元田鴉色白。
於鷗丹室蛇光紅，似蝮石函綠。字紫泥封元圃瓊，華青子種白螺。
有迹蹋石田，金虎無聲飲銀汞。樵柯已爛商四朋，蕊葦初過茅二
仲。牛車望氣待著書，螺女行廚時進供。胡麻留飯阮郎來，林屋刺
船毛父迴王生。石髓隨手堅吳客，求珠空耳縫九靈。太廟苞母氣
五岳真圖特兒弄，書傳丹篆再何須。石化黃金本無用，玉盆濯髮
天雞鳴鐵笛穿空神。馬鞋符行律令鬼，承呵聲出腦宮龍。聽頌未
應片石隔仙凡，溪上桃花自迎送。

乙酉四月二日與蔣桂軒伯仲諸友同泛震澤大小雷望洞
庭之峯吹笛飲酒乘月而歸，蓋不異老杜坡僊遊滢波赤壁。

也舟中各賦詩余賦二十韻爲首唱

楊維順

江國春歸夏云孟十日五日風雨橫具區擺盪浪如山吳兒善泅
并敢榜今朝氣候昨不同湖頭無雨兼無風小施祠前棹歌發樓
船下水如游龍大雷不動小雷伏銀海空青光奪目魚龍百怪暫
祓除平展輕綃三百幅牙檣五兩空中舉陳瀆村中過撾鼓燒筍
旣憩彭城灣采蓴復渡楊家浦中流颯發占莫徠須臾鯨浪吼蒲
牢長年捩柁稱好手小腰失著生寒毛蔣家二子素奇士更有登
高羊叔子老崖鐵笛上青雲玉龍穿空卷秋水船頭可奈風水何
拔劍擬砍生蛟攄人生哀樂固相半神靈涉意毋過多嗚夷入海
人不識漁婦漁王配寒食鄉里小兒舞竹枝乞與神童舞鶴欲我

聞洞庭之宰其橋大如斗剖而食之見突叟弱水不隔天表流獨
我胡爲牛馬走五湖挂席從此首

題小石灣

俞遠

前年遊小石小石之下江悠悠今年遊小石江水只似前年流江
流日夜流不息石根水齧成沙礫王家銀瓶三尺高長向江邊宴
賓客江邊雲木藏華構主人不歸春鎖畫開門掃地借鋪筵舞影
山闌驚雉雛一春天氣今日佳城中千人萬人來步障飄紅香散
霧撲面不去飛塵埃移樽更就江流飲酒光五色沙如錦懸崖欲
落未落處挽客更壁毛髮凜青天龍挂東海門颺風忽來天晝昏
白波如山潑山鼻坐恐此地爲江吞金支翠旗光閃灑冉冉露胥

騎白馬我欲招之招不來大鯨噓紅射蓋竿此景向來長不侔丈
夫跌絕婦女愁手中橫竹孤鳳叫日脚迸落蘼蕪洲眼空高興不
可遏割肉大啖湯沃雪風休月出浪復止小娃強歌聲不悅我言
小石天下無眾客相顧皆胡盧說東洛談西湖我請謝客客莫誣
西湖白鶴去不返東洛看花生已晚

題澄江櫂歌

郝仲義

半山昔拜少陵像謂公詩與元氣侔後五百歲無繼者元氣茫茫
散不收我朝詩派因中州氣節首推劉靜修宋季陋習茲一洒天
運亦復壽家流楊趙馬范虞揭歐金華莆田誰與儔亂來風雅久
衰落喜向澄江聞櫂謳澄江席帽同羊裘風塵之表從天遊每和

君山老父笛不換華頂仙人舟有時擊節驚陽侯百怪莫敢窺十
洲鯨波可蹈惜沈劔鼇嶠欲蹋思連鉤澄江浪高江月浮江神迎
權風颼颼雲機上割天孫錦底用枯槎橫斗牛放歌濯足銀河秋
洄沿不爲澄江畱誰道澄江淨如練我視澄江直一漚此日相遭
東海頭東海纖塵生我眸醉擊珊瑚碎蓬磔笑委蛟珠輕博戲俗
淫世靡吾所羞孤鳳默默羣鳥啾夏舫一扣海能小祖楫載誓天
何尤澄江權歌歌未休凝碧管弦非所憂君詩匪予得稱好贈言
請視今汪周

題溪山勝槩樓

陳顯曾

江南二月羅衣裳藤花滿地山雲香背人小燕撒波去朱簾白日

遊絲長蒲茸綠淺芹芽紫沙上輕烟溼飛雨美人遙睇木蘭船一
夜相思隔春水

過毘陵

陳孚

毘陵城西漁火紅家家夜香燒碧空荻花離離季子塚楓葉索索
春申宮雞聲人語三十里大船小船浪相倚鷓鴣一雙飛上天人
在柁樓弄秋水

江南春

倪瓚

汀洲夜雨生蘆筍日出曛曛簾幙靜鶯禽蹴破杏花烟陌上東風
吹_三影_三遠_三江_三清_三暗_三劍_三光_三冷_三鞭_三韃_三水_三咽_三青_三苔_三并_三落_三花_三飛_三燕_三觸_三衣_三巾_三沈_三
香火微燐_三照_三磨_三

題惠山寺

釋明本

惠山屹立千仞青俯瞰天地鴻毛輕七竅既鑿渾沌死九龍攫霧
雷神驚霹靂聲中厓石裂銀泉迸出清鉛穴惟恨當年桑苧翁玉
浪翻空煮春雪何如跨龍飛上天併與挈過崑崙巔散作大地清
涼雨免使蒼生受辛苦我來扣泉泉無聲一曲冷光沈萬古殿前
風檜砉然鳴日暮山靈打鐘鼓

蕭寺早行

許恕

張家宅前蕭寺橋侵晨發船江霧消村雞三唱屋角樹柔櫓數聲
沙際潮此時飛上海底日錦雲滿江光蕩搖水聲澌澌遶灘轉霜
氣烈烈隨風飄人生各各有所役豈水有漁山有樵干戈正集沙

塞戰環珮已退天門朝嗟予久作江海客往來自歎鄉關遙石田
茅屋倘可遂白日醉眠吹短簫

編籬曲

華幼武

編竹籬密密編朝禦雞犬入莫防豺虎穿交加編聯互相倚竹密
藤纏堅莫比春風披拂百花開一片繁華如錦綺君不見西家有
籬編不密夜夜驚呼防盜賊願言兄弟莫相疑明日齊心編竹籬

遊龍巖三洞之間

周砥

商顏紫芝久不採淮南丹書竟安在仙人勸我三洞遊身如騎龍
到東海海氣茫茫雲霧迴白波捲雪連山來雙童手弄海底日紅
光一道金蓮開瑤草綠可折瓊樹花冥冥昔人煉丹丹竈在錦壘

繡石光青熒雷行半空中
逢逢擊天鼓玉女鸞笙時
下來前頭四足神魚舞
醉拂珊瑚鞭玉虎我欲用
之窮洞府閒訪八公五雲裏
爲說蒼生受辛苦不然飛出
西華嶺太極總仙之洞天安
得周迴更二千直與龍巖之
洞相鉤連蓮花峯上重攜手
笑攬霞觴窺八

垤

湖上吟

沈貞

悠悠湖中水不可窮冥搜
幽幽湖上山不能成勝遊
山水茫茫天盡頭扶桑日漾
紅玉毬把酒臨風相勸酬
高吟大唱驚眠鷗紫霞流光
拍天浮豪鳴鼉鼉舞蛟虬
龍伯國人持釣鉤不肯浪中
投鷗夷子皮竊妻來不肯下
扁舟大笑立湖邊欲知此意
不半岸烏紗

巾斜披紫雲裘秋風吹骨寒
颼颼磨斥八極隘九州傲睨物表
瞪雙眸狂呼李太白捉月遡浪流
喚取岑夫子復召元丹邱元氣未
洩如覆甌神仙有無不可求此卽是蓬萊此卽是瀛洲何須白玉
京五城十三樓腦中長虹爛不收
奚爲自繫如楚囚莫學仲尼栖
栖魯莫作孟子區區鄒長笛一聲孤鶴橫
秋與爾爭洗萬斛之閒愁
山幽幽水悠悠

常郡八邑藝文志卷十